



# Verklaring en verbintenis van die NG Kerk ten opsigte van MIV en vigs

**Die Nederduitse Gereformeerde Kerk (NG Kerk)** het op 14 Oktober 1998, tydens die sitting van sy Algemene Sinode, reeds sy verbintenis tot die stryd teen MIV en vigs verwoord.

Die volgende verklaring is 'n herbevestiging en uitbreiding van hierdie verbintenis.

Die NG Kerk wil, in die voetspore van Jesus Christus, die gekruisigde en opgestane Here, sy roeping ten opsigte van en betrokkenheid by MIV en vigs op 'n priesterlike, koninklike en profetiese wyse vervul:

## 1. **Ons erken en bely:**

- ⓧ dat onkunde, vooroordeel en ontkenning nog in baie lidmate se harte leef;
- ⓧ dat ons nie altyd die vernietigende effek wat die MIV en vigs-pandemie op ons gemeenskappe, gemeentes, gesinne en lidmate het, deur God se oë raaksien nie;
- ⓧ dat ons nie genoegsaam God se liefde utiveel teenoor mense wat deur MIV en vigs geïnfekteer of geïmpak is nie, en
- ⓧ dat van ons NG lidmate ook met MIV en vigs leef.

## 2. **Ons wil liefde en deernis betoon aan alle mense wat met MIV en vigs leef, die geïnfekteerdes sowel as die geïmpaktes. Ons wil dit doen deur:**

- ⓧ ons toe te lê daarop om begeleiding en ondersteuning te bied aan elkeen wat hartseer en pyn beleef, veral aan almal wat deur die kerk en breër samelewing verwerp of alleen gelaat word;
- ⓧ 'n boodskap van hoop en omgee oor te dra aan lidmate wat met MIV en vigs leef;
- ⓧ ons te beywer om mites, verkeerde gesindhede en diskriminerende optrede binne ons gemeentes en gemeenskappe af te breek en voorspraak te doen vir almal wat as gevolg van MIV en vigs ly;
- ⓧ ons gemeentes plekke te maak waar mense wat deur MIV en vigs geïnfekteer of geïmpak is, welkom en geborge sal voel, en
- ⓧ diensbaar te wees deur die omvattende nood in Suidelike Afrika te verlig.

**Ons wil dit doen deur programme en projekte, binne en buite ons gemeentegrense, te help ontwikkel, te implementeer en te ondersteun, wat onder meer sal insluit:**

- ⓧ die versorging en begeleiding van die groot getalle kinders wat wees gelaat word, onder meer deur gemeenskapsorgmodelle;
- ⓧ die emosionele en geestelike begeleiding van mense wat deur MIV en vigs geïnfekteer en geïmpak is, onder meer deur ondersteuningsgroepe;
- ⓧ die fisieke versorging van mense wat met MIV en vigs leef, onder meer deur tuis- en gemeenskapsorg;
- ⓧ inligtings- en opvoedingsprogramme wat mense wat met MIV en vigs leef, sal help om langer gesond te kan bly, asook om die fisieke en emosionele pyn te verlig, en
- ⓧ werkskeppingsprojekte.

## 3. **Bogenoemde impliseer ook die beskikbaarstelling van kennis, mannekrag en fasiliteite tot ons beskikking.**

## 4. **Ons wil die verspreiding van MIV bekamp deur die bou van Bybelse morele waardes ten opsigte van seksuele gedrag. Daarom:**

- ⓧ roep ons egpare op om getrou te bly aan mekaar as lewensmaats;
- ⓧ roep ons ouers op om hulle verantwoordelikheid ten opsigte van die seksopvoeding van hulle kinders na te kom;
- ⓧ roep ons opvoeders op om in hulle omvattende opvoedingstaak, kinders en jongmense voortdurend te wys op die gevare van vrye seks en 'n immorele lewe, en
- ⓧ roep ons kinders, jongmense en volwasse individue op om seksuele verkeer voor die huwelik uit innerlike oortuiging as Christene te vermy.

## 5. **Ons wil die omstandighede wat die vinnige verspreiding van die MIV-infeksie aanwakker, teenwerk. Ons wil alles in ons vermoë doen om:**

- ⓧ die gesinslewe van ons lidmate, geskoei op Bybelse beginsels, te versterk;
- ⓧ armoede, geweld teen vroue en kinders, asook dwelmmisbruik te bekamp;
- ⓧ die korrekte en volledige inligting oor MIV en vigs beskikbaar te stel;
- ⓧ mediese navorsers en personeel aan te moedig om voort te gaan met navorsing ten einde die beste voorkomende of genesende middel te vind, asook om vigs pasiënte met sorg, deernis en waardigheid te behandel;
- ⓧ vrywillige toetsing vir MIV, veral ook onder ons lidmate, aan te moedig;
- ⓧ die boodskap van seksuele onthouding voor die huwelik ondubbelsinnig oor te dra en om die implikasies van ander beskermingsmaatreëls te verduidelik, en
- ⓧ aktief daaraan te werk om die stigmatisering en veroordeling van mense met MIV en vigs teen te werk.

## 6. **Ons verklaar dat ons in hierdie belangrike saak samewerking en vennootskappe met die owerheid en relevante rolspelers soek, aanmoedig en waar nodig kerklike strukture te skep om samewerking te bevorder.**

## 7. **Ons bede is dat God Drie-enig ons as NG Kerk die krag sal gee om as gehoorsame getuies van die evangelie, ons verantwoordelikheid en roeping tot eer van sy Naam en tot uitbreiding van sy koninkryk na te kom.**

Hierdie verklaring is goedgekeur deur  
die Algemene Sinode van die NG Kerk op 16 Oktober 2002  
as die standpunt van die NG Kerk ten opsigte van MIV en vigs.